

Pwyllgor Plant a Phobl Ifanc

Dyddiad: 22 Tachwedd 2012

Lleoliad: Y Senedd, Cynulliad Cenedlaethol Cymru

Teitl: Ymchwiliad i waith Gwasanaeth Cynghori a Chynorthwyo Llys i Blant a Theuluoedd (CAFCASS Cymru)

Diben

1. Mae'r papur hwn yn rhoi tystiolaeth CAFCASS Cymru i ymchwiliad Pwyllgor Plant a Phobl Ifanc Cynulliad Cenedlaethol Cymru i waith y sefydliad. Mae'r dystiolaeth yn canolbwyntio ar y meysydd a ddynodwyd i'r Pwyllgor graffu arnynt fel rhan o'i ymchwiliad.

Cyflwyniad: Trosolwg o gynnydd a chyflawniadau

2. Mae CAFCASS Cymru'n chwarae rôl hanfodol yn y gwaith o gynorthwyo plant a theuluoedd sy'n ymwneud ag achosion mewn llysoedd teulu. Mae'n cynghori'r llysoedd ar y ffordd orau o weithredu ar sail asesiad o fudd pennaf plant unigol. Ei ddiben yw diogelu'r plentyn a sicrhau y clywir ei lais yn y system cyfiawnder teuluol.
3. Mae lles y plentyn yn y dyfodol yn greiddiol i bob cam a gymerir gan CAFCASS Cymru.
4. Wrth ymateb i adroddiad Arolygiaeth Gofal a Gwasanaethau Cymdeithasol Cymru (AGGCC) a gyhoeddwyd ym mis Tachwedd 2010, dechreuodd CAFCASS Cymru raglen uchelgeisiol o newid. Mae'r prif elfennau wedi cynnwys:
 - Ad-drefnu'r sefydliad gan greu strwythur rhanbarthol sy'n gydffiniol â model y Byrddau Iechyd Lleol, a ddisgrifir gan gynrychiolydd o Prospect mewn cyfarfod o Fforwm Partneriaeth yr Adran Iechyd, Gwasanaethau Cymdeithasol a Phlant ym mis Medi 2011 fel ad-drefnu enghreifftiol yn Llywodraeth Cymru.
 - Galluogodd yr ad-drefnu ryddhau adnoddau i gefnogi'r gwaith o gyflenwi gwasanaethau rheng flaen.
 - Lleihau'n sylweddol yr achosion oedd wedi cronni ac yn aros i gael eu dyrannu, er gwaethaf cael y nifer fwyaf o atgyfeiriadau gofal yn hanes y sefydliad.
 - Datblygu perthnasoedd strategol gydag Awdurdodau Lleol, y Farnwriaeth a Gwasanaeth Llysoedd a Thribiwnlysoedd Ei Mawrhydi (GLITEM).
 - Lansio Cynllun Strategol CAFCASS Cymru 2012 –15 ym mis Ionawr 2012 yn dilyn ymgynghoriad gyda phlant a phobl ifanc ar ei ddatblygiad.
 - Fersiwn i blant o'r Cynllun Strategol.
 - Ymgynghori gyda phlant a phobl ifanc ar ddatblygiad pecynnau Gwybodaeth i Blant sy'n rhoi gwybodaeth i blant am CAFCASS Cymru a'r gwasanaethau a ddarperir mewn fformat addas i'r oedran. Lansiodd y pecynnau hyn ar 12^{fed} Tachwedd 2012.
 - Cyflwyno proses Cwynion newydd sy'n gyson â chanllawiau Prif Weinidog Cymru ar reoli cwynion gan Wasanaethau Cyhoeddus.
 - Cynnal adolygiad darbodus cynhwysfawr o'r prosesau gweinyddu ar draws y sefydliad i sicrhau gwell cysondeb ac effeithlonrwydd.

- Cynnal adolygiad o wasanaethau cyswllt â phlant ledled Cymru, gan weithredu strategaeth ar gyfer gwell darpariaeth, trefniadau ariannu tecach a gwell rheoli ar y rhwydwaith darpariaeth gwasanaethau Cymru Gyfan o fis Ebrill 2013 ymlaen.
- Datblygu a gwella'r gallu i reoli gwaith yn electronig, gan gynnwys gweithredu datrysiad sganio sy'n integreiddio'r system electronig i reoli achosion a system electronig Llywodraeth Cymru i reoli cofnodion.

Meysydd i gael eu hadolygu gan y Pwyllgor

Y cynnydd a wnaethpwyd wrth weithredu argymhellion arolygiad Arolygiaeth Gofal a Gwasanaethau Cymdeithasol Cymru (AGGCC) ym mis Tachwedd 2010 a'r ailstrwythuro sefydliadol a ddigwyddodd yn CAFCASS Cymru wedi hynny

- **Argymhellion yr arolygiad**

5. Cynhaliodd Arolygiaeth Gofal a Gwasanaethau Cymdeithasol Cymru (AGGCC) arolygiad helaeth o CAFCASS Cymru yn 2010. Yn dilyn gradd foddhaol gyffredinol, datblygwyd cynlluniau gweithredu a rhaglenni gwaith i fynd i'r afael â'r wyth argymhelliad a wnaethpwyd gan y tîm arolygu:

Cyf	Argymhelliad	Statws
A	Adolygu strwythur cyffredinol y sefydliad er mwyn sicrhau arweinyddiaeth effeithiol, goruchwyliaeth gan reolwyr ac atebolrwydd y gwasanaeth.	Wedi'i gwblhau. Strwythur sefydliadol newydd yn bodoli mis Hydref 2011.
B	Datblygu a gweithredu system ar gyfer cael adborth a gwerthusiadau gan ddefnyddwyr sy'n blant a phobl ifanc, sy'n cyfrannu at newid arferion gwaith a pholisïau.	Gwaith ar y gweill fel rhan o agenda cyfranogiad y sefydliad (gweler hefyd yr ymateb ym mharagraffau 15-27).
C	Datblygu a gweithredu system ar gyfer cael adborth a gwerthusiadau gan ddefnyddwyr sy'n oedolion, sy'n cyfrannu at newid arferion gwaith a pholisïau.	Wedi'i gwblhau. Anfonir holiaduron defnyddwyr gwasanaeth sy'n oedolion fel mater o drefn i bob defnyddiwr gwasanaeth fel rhan o becyn croeso'r sefydliad. Mae Uwch Dîm Rheoli'r sefydliad yn gwerthuso'r adborth bob chwarter ac yn nodi camau gweithredu lle bo'n berthnasol.
D	Cynnal adolygiad llawn o'r prosesau, y gweithdrefnau a'r arferion gwaith o ran cwynion, a gwella'r broses o ymdrin â chwynion ar draws y sefydliad.	Mae'r adolygiad wedi cael ei gwblhau ac mae proses newydd wedi cael ei chyflwyno. Mae gwaith yn cael ei wneud ar hyn o bryd i wreiddio'r broses newydd yn llawn ac yn effeithiol.
E	Gwella gwasanaethau i blant ag anableddau.	Gwaith ar y gweill. Wedi'i gynnwys fel rhan o agenda cyfranogiad y sefydliad (gweler hefyd yr ymateb ym mharagraffau 15-27).

Cyf	Argymhelliad	Statws
F	Datblygu a gweithredu fframweithiau rheoli perfformiad a sicrhau ansawdd effeithiol.	Gwaith ar y gweill. Mae prosesau rheoli perfformiad cadarn yn bodoli ac mae gwybodaeth yn cael ei rhannu fel mater o drefn gyda GLITEM a Phenaethiaid Gwasanaethau Plant er mwyn gwella perfformiad yn gydweithredol. Mae mecanweithiau archwilio gwell yn cael eu datblygu a'u gweithredu.
G	Adolygu'r Fframwaith Cynllunio, Cofnodi ac Asesu Achosion.	Gwaith ar y gweill. Mae cyfeiriadur pwrpasol o offer asesu'n cael ei ddatblygu ar hyn o bryd. Nod y rhain yw cefnogi a chryfhau arferion asesu a gwella ansawdd a chysondeb yn y gwaith o wneud penderfyniadau ac o ran argymhellion a dadansoddiadau. Caiff yr offer eu lansio yn 2013 gyda chefnogaeth ar ffurf sesiynau hyfforddiant pwrpasol i ymarferwyr.
H	Y Pecyn Cymorth Trais Domestig i gael ei adolygu.	Wedi'i gwblhau.

6. Yn eu llythyr at y Prif Weithredwr dyddiedig Ionawr 2012, roedd yn galonddid i AGGCC weld y cynnydd oedd wedi cael ei wneud wrth weithredu eu hargymhellion, a nodasant na fyddai angen cymryd unrhyw gamau eraill hyd nes eu harolygiad nesaf yn 2013.
7. Mae'r Uwch Dîm Rheoli'n dal i fwrw ymlaen yn gadarn â'r gwaith o weithredu argymhellion yr Arolygiad, sydd bellach wedi cael eu cynnwys yng Nghynllun Strategol y sefydliad. Mae hyn yn cael ei fonitro bob chwarter.
8. Wrth ragweld gofynion y diwygiadau mawr i'r system cyfiawnder teuluol wrth ymateb i'r Adolygiad Cyfiawnder Teuluol, mae Fframwaith Gweithredu'n cael ei ddatblygu. Bydd y Fframwaith yn nodi disgwyliau a chanllawiau clir o ran arferion i Gynghorwyr Llys Teulu er mwyn sicrhau bod pob plentyn sy'n cael ei atgyfeirio i'r sefydliad yn cael gwasanaeth cyson wedi'i seilio ar ansawdd. Rhagwelir y caiff hyn ei lansio erbyn mis Ebrill 2013.
9. Mae Pecyn Cymorth Trais Domestig wedi cael ei ddatblygu sy'n dwyn ynghyd nifer o adnoddau electronig i gynorthwyo Cynghorwyr Llys Teulu i sicrhau bod risgiau'n cael eu nodi'n gynnar, ac i wneud penderfyniadau ac argymhellion gwybodus i'r Llys. Mae safle mewnrwyd CAF/CASS Cymru hefyd wedi cael ei ddiwygio i'w gwneud yn haws i ymarferwyr y rheng flaen gyrchu dogfennau sy'n ymwneud â Cham-drin Domestig.

- **Ad-drefnu'r sefydliad**

10. Yn dilyn penodi Prif Weithredwr newydd ym mis Tachwedd 2010 cafodd adolygiad o strwythur CAFCASS Cymru ei ddechrau ar unwaith. Ymgynghorwyd â'r staff trwy gydol yr adolygiad, a rhoddwyd gwybod iddynt am y cynnydd yn rheolaidd. Er mwyn sicrhau cyn lleied o ansicrwydd ag oedd yn bosibl ymysg y staff, cafodd yr ymgynghoriad ei gwblhau erbyn mis Mawrth 2011 a chafodd y strwythur newydd ei gytuno a'i weithredu.
11. Mae'r ardaloedd cyflenwi gweithredol wedi cael eu had-drefnu'n unol â model y Byrddau Iechyd Lleol. Lleihawyd y timau o 10 i 5 tîm sy'n gweithio o 15 swyddfa.
12. Hanerwyd yr Uwch Dîm Rheoli a dilynodd raglen arweinyddiaeth wedi'i thargedu ar gryfhau gallu arweinyddiaeth strategol y sefydliad.
13. Lleihawyd y timau canolog o 3 i 1.
14. Mae tîm canolog Gwaith Cyfraith Breifat i Wrandawriad Cyntaf wedi cael ei sefydlu i wella cysondeb y ddarpariaeth gwasanaethau.
15. Mae'r sefydliad wedi sefydlu swydd newydd Rheolwr Arfer i wella'r cymorth a ddarperir i ymarferwyr y rheng flaen.
16. Yn sylfaen i'r newidiadau strwythurol roedd y gwaith o ddatblygu system gadarn i ddadansoddi gwybodaeth rheoli perfformiad.

Pa mor effeithiol mae CAFCASS Cymru yn cyflenwi ei wasanaethau'n unol â Chonfensiwn y Cenhedloedd Unedig ar Hawliau'r Plentyn, er enghraifft, ymgysylltu â defnyddwyr, gwneud penderfyniadau er budd pennaf y plentyn

17. Mae'r gwaith o weithredu Mesur Hawliau Plant a Phobl Ifanc (Cymru) mewn dau gam. Bydd yr ail gam, sy'n dod i rym o 1 Mai 2014 ymlaen, yn ei gwneud yn ofynnol i Weinidogion Cymru roi sylw dyledus i erthyglau Confensiwn y Cenhedloedd Unedig ar Hawliau'r Plentyn wrth arfer eu holl swyddogaethau, gan gynnwys swyddogaethau CAFCASS Cymru. Mae hyn yn golygu y bydd angen i Gynghorwyr Llys Teulu hwythau yn eu tro roi sylw dyledus i erthyglau'r Confensiwn pan fyddant yn cyflawni eu dyletswyddau mewn achosion teuluol. Ar hyn o bryd, bydd adroddiad y Llys yn adlewyrchu'r ffaith mai lles y plentyn fydd ystyriaeth bennaf y llys yn unol â Deddf Plant 1989.
18. Penderfynodd Uwch Dîm Rheoli CAFCASS Cymru ei gwneud yn orfodol i'r holl staff gwblhau hyfforddiant Llywodraeth Cymru ar y Confensiwn. Mae cyfraddau cwblhau wedi cael eu monitro'n fanwl er mwyn sicrhau cydymffurfiaeth lawn â'r gofyniad hwn.
19. Er mwyn dangos yn glir ymrwymiad y sefydliad i ymgysylltu'n effeithiol â phlant, mae'r Uwch Dîm Rheoli wedi cael hyfforddiant pwrpasol ar gyfranogiad plant a sut y gellid datblygu a gwella hyn ledled y sefydliad.

20. Mae hyn wedi cael ei ategu trwy gynnal cyfres o ddigwyddiadau hyfforddiant rhanbarthol i staff y sefydliad, wedi'u hwyluso gan Gyfranogaeth Cymru, gyda'r nod o godi ymwybyddiaeth o bwysigrwydd cyfranogiad ac ymgysylltu yng ngwaith CAFCASS Cymru.
21. Yn ystod haf 2011 cynhaliwyd digwyddiadau Cyfranogiad Plant ledled Cymru i ymgynghori ar fersiwn i blant o'r Cynllun Strategol newydd. Rhoddodd y digwyddiadau hyn gyfle hefyd i ymgynghori ar ddatblygiad a chynnwys y Pecynnau Gwybodaeth i Blant, sy'n darparu gwybodaeth i blant a phobl ifanc am wasanaethau CAFCASS Cymru mewn fformat addas i'r oedran.
22. Mae gwaith yn parhau ar gyfranogiad plant trwy'r gwaith o ddatblygu ac adolygu cynllun cyfranogiad ac ymgysylltu â defnyddwyr gwasanaeth.
23. Mae ymdrechion dygn wedi cael eu gwneud eleni i recriwtio Rheolwr Cyfranogiad, fydd â'r cyfrifoldeb am gyflawni cynllun Cyfranogiad y sefydliad. Hyd yma, nid yw'r ymdrechion hyn wedi bod yn llwyddiannus. Felly mae'r sefydliad yn dilyn proses manyleb a thendr Llywodraeth Cymru gyda golwg ar benodi darparwr cyfranogiad allanol i gynorthwyo â'r gwaith o fwrw ymlaen â'r agenda cyfranogiad.
24. Fel rhan o broses cwynion bwrpasol y sefydliad i blant, cytunwyd ar drefniadau eiriolaeth i blant gyda Thros Gynnal Plant a'r Gwasanaeth Eiriolaeth Ieuenctid Cenedlaethol er mwyn sicrhau y darperir cymorth eiriolaeth a modd i fanteisio arni, lle bo angen, i blant sydd eisiau gwneud cwyn.
25. Mae taflenni gwybodaeth i blant sydd eisiau gwneud cwyn i'w cael yn y pecyn Gwybodaeth i Blant. Rydym yn croesawu'r cynnig gan y Comisiynydd Plant i rannu'r daflen cwynion i blant sydd gan ei swyddfa a rhoi cyfle i'r sefydliad ei mabwysiadu a'i haddasu.
26. Mae pecyn gwybodaeth addas ar gyfer plant wedi cael ei ddatblygu gan ymgynghori â phlant a phobl ifanc, rhanddeiliaid a staff, ac mae i fod i gael ei gyflwyno ym mis Tachwedd 2012.
27. Mae gwella ein gwasanaethau i blant ag anableddau'n rhan o agenda cyfranogiad y sefydliad. Mae cyfeiriadur CAFCASS Cymru o brofiad a sgiliau ymarferwyr wrth weithio gyda phlant ag anableddau'n cael ei ddatblygu ar hyn o bryd, a bydd yn adnodd i ymarferwyr i gefnogi gwaith effeithiol yn y maes hwn.
28. Mae'r Rhestr Wirio Lles Plant a Phobl Ifanc yn adnodd asesu sydd wedi cael ei ddatblygu gan yr Athro Gordon Harold, Seicolegydd Plant, ynghyd â CAFCASS Cymru. Mae'n gosod ymatebion a phrofiadau plant wrth wraidd y broses asesu yng nghyd-destun dod i gysylltiad â gwrthdaro rhwng rhieni a/neu gam-drin domestig.
29. Un o gryfderau'r sefydliad yw ein bod ni'n ymdrechu'n ddi-baid i sicrhau y clywir llais y plentyn mewn Achosion Teuluol, fel y dengys ymateb Pwyllgor Llysoedd Teulu Cymdeithas yr Ynadon.

30. Rydym yn croesawu'r awgrym gan Gymdeithas Cyfarwyddwyr Gwasanaethau Cymdeithasol Cymru y dylai ein gwefan gael ei gwella trwy gael rhan benodol i blant a phobl ifanc ac y dylid adolygu'r ffordd yr ydym yn defnyddio cyfryngau cymdeithasol. Byddwn yn gweithio gyda chydweithwyr yn Llywodraeth Cymru i weithredu'r awgrymiadau defnyddiol hyn.

Pa mor effeithiol mae CAF/CASS Cymru yn cyflawni ei rôl o ddarparu canolfannau cyswllt â phlant

31. Yn 2011 cynhaliodd CAF/CASS Cymru adolygiad cynhwysfawr o'r Gwasanaethau Cyswllt â Phlant ledled Cymru. Datgelodd yr adolygiad fod y ddarpariaeth yn anghyson ac yn fylchog, fod cyllido'n annheg ac nad oedd y rhwydwaith ar gyfer darparwyr gwasanaethau cyswllt yn cael ei reoli'n effeithiol. Yn dilyn yr adolygiad, amlinellodd CAF/CASS Cymru ei gynlluniau ar gyfer darpariaeth, cyllido a threfniadau cymorth yn y dyfodol ar gyfer y Gwasanaethau Cyswllt â Phlant yng Nghymru i'r Dirprwy Weinidog.
32. Mae'r cynlluniau hyn yn ceisio mynd i'r afael â'r materion a nodwyd yn yr adolygiad, a chânt eu gwireddu'n llawn o fis Ebrill 2013 ymlaen. Hyd yma, gwnaethpwyd cynnydd sylweddol wrth weithredu'r cynlluniau mewn partneriaeth â'r darparwyr presennol.
33. Mae trefniadau trosiannol yn bodoli ar gyfer 2012-13, ac mae cyllid wedi ei dargedu i ardaloedd â blaenoriaeth ledled Cymru. O ganlyniad, mae 4 Canolfan Cyswllt â Phlant ychwanegol wedi cael eu hariannu ar sail 12 mis yn Y Fenni, Castell-nedd Port Talbot, Glynebwy a Phontllanfraith.
34. Mae'r cynlluniau hyn yn cynnwys comisiynu darpariaeth gwasanaeth cyswllt yn rhanbarthol yn unol â'r egwyddorion a nodir yn fframwaith Llywodraeth Cymru ar gyfer *Gwasanaethau Cymdeithasol Cynaliadwy i Gymru*, ac maent yn gyson â model y Byrddau Iechyd Lleol a threfn weithredol CAF/CASS Cymru.
35. Er mwyn gwella sicrwydd ansawdd a chysondeb ledled Cymru, mae penodi Rheolwr Rhwydwaith annibynnol â sgiliau cydnabyddedig i reoli rhwydwaith darparwyr gwasanaeth Cyswllt â Phlant Cymru gyfan ar ran Llywodraeth Cymru wedi bod yn ddatblygiad allweddol.
36. Yn dilyn ymarfer caffael, mae CAF/CASS Cymru, gyda chymorth timau sy'n arbenigo mewn Rhagoriaeth Grantiau, Gwasanaethau Cyfreithiol a Chaffael, wedi penodi Cymdeithas Genedlaethol y Canolfannau Cyswllt â Phlant i fod yn Rheolwr Rhwydwaith ar gyfer rhwydwaith darparwyr gwasanaeth Cyswllt â Phlant Cymru gyfan ym mis Awst 2012.
37. Yn ddiweddar, cychwynnwyd ar broses o ddyfarnu grantiau mewn perthynas â darparu'r gwasanaeth cyswllt o fis Ebrill 2013 ymlaen. Bydd y darparwyr yn cyflwyno ceisiadau am grantiau erbyn mis Rhagfyr 2012, a bydd y rhain yn sail i'r penderfyniadau a'r argymhellion a wneir gan roi ystyriaeth i'r lefelau galw. Bydd y cynigwyr llwyddiannus yn cael arian dangosol am 3 blynedd.

Goblygiadau'r Adolygiad Cyfiawnder Teuluol a'i effaith ar waith CAF/CASS Cymru

38. Mae CAF/CASS Cymru'n croesawu'r diwygiadau mawr i'r system cyfiawnder teuluol sy'n cael eu cyflawni mewn ymateb i'r Adolygiad Cyfiawnder Teuluol a'r cyfleoedd a ddaw yn sgil hyn i wella gwasanaethau a chanlyniadau i blant a theuluoedd yng Nghymru.
39. Sefydlwyd Bwrdd Cyfiawnder Teuluol newydd i Gymru a Lloegr i ddarparu mwy o arweinyddiaeth a chydgyssylltu ar draws y system. Mae'r aelodaeth o Gymru'n cynnwys cynrychiolwyr o Lywodraeth Cymru, Cymdeithas Cyfarwyddwyr Gwasanaethau Cymdeithasol Cymru a CAF/CASS Cymru.
40. Er mwyn ategu a chynorthwyo gwaith y Bwrdd, cyhoeddodd y Dirprwy Weinidog Plant a Gwasanaethau Cymdeithasol y bydd Rhwydwaith Cyfiawnder Teuluol newydd yn cael ei greu i ddwyn ynghyd asiantaethau craidd yn y system cyfiawnder teuluol yng Nghymru, gan gynnwys CAF/CASS Cymru, i gydweithio a dymchwel rhwystrau at ddiben gwella perfformiad yng Nghymru.
41. Mae CAF/CASS Cymru yn cydnabod bod perthnasoedd effeithiol gyda phartneriaid a rhanddeiliaid yn hanfodol i gyflenwi a gwella gwasanaethau. Yn ystod 2011-12, mae'r sefydliad wedi cryfhau ei berthnasoedd yn genedlaethol, yn rhanbarthol ac yn lleol, gan gynnwys:
 - a. Mae Prif Weithredwr CAF/CASS Cymru yn ymgysylltu'n rheolaidd â'r Meistr Ustus Moor, Barnwr Cyswllt yr Adran Deuluol dros Gymru ac uwch swyddogion o Wasanaeth Llysoedd a Thribiwnlysoedd Ei Mawrhydi (GLITEM).
 - b. Roedd CAF/CASS Cymru yn cydnabod bod angen iddo ddatblygu perthynas fwy effeithiol gyda Chymdeithas Cyfarwyddwyr Gwasanaethau Cymdeithasol Cymru yn arbennig, ac mae'n gwerthfawrogi'n fawr y trafodaethau a'r ymgysylltu adeiladol sydd bellach yn digwydd yn rheolaidd yn genedlaethol ac yn lleol.
 - c. Ers mis Chwefror 2012, mae CAF/CASS Cymru wedi cynnal cyfarfodydd teirochrol gyda Phenaethiaid Gwasanaethau Plant Cymru gyfan ac GLITEM i nodi heriau'r rhaglen ddiwygio ac i gydweithio i wella'r gwasanaethau a ddarperir i blant, i deuluoedd ac i'r Llysoedd. Daeth hyn wedyn yn is-grŵp yn y Rhwydwaith Cyfiawnder Teuluol.
 - d. Ym mis Mawrth a mis Ebrill 2012, hwylusodd CAF/CASS Cymru ddwy gynhadledd ar y cyd oedd yn cynnwys cynrychiolwyr o staff GLITEM yng Nghymru a chynghorwyr ar gyfraith teulu; ymarferwyr, gweinyddwyr a rheolwyr CAF/CASS Cymru; y farnwriaeth deuluol ac ynadon panel teuluol ynghyd â chyfreithwyr Awdurdodau Lleol. Nodau'r gweithdai oedd datblygu trefniadau gweithio agosach rhwng yr holl asiantaethau cyfiawnder teuluol statudol perthnasol yng Nghymru, lleihau oedi mewn achosion teuluol, cyfrannu at sicrhau canlyniadau gwell i blant a chanolbwyntio'r gwasanaethau ar anghenion y plentyn.
 - e. Mae CAF/CASS Cymru yn gwerthfawrogi'r cymorth a roddir gan ei Bwyllgor Cynghori o dan gadeiryddiaeth Ms Catriona Williams. Mae'r Pwyllgor hwn yn ei gwneud yn bosibl i ymgysylltu'n rheolaidd â sefydliadau'r Trydydd Sector ac

mae wedi caniatáu i amrywiaeth fawr o sefydliadau sy'n rhanddeiliaid graffu ar raglenni newid CAF/CASS Cymru.

42. Mae CAF/CASS Cymru wedi cymryd rôl arweiniol yn y gwaith o gyflawni'r diwygiadau i'r system cyfiawnder teuluol yng Nghymru. Yn benodol, mae CAF/CASS Cymru'n rhannu ei ddata craidd yn rheolaidd gyda'i bartneriaid yn yr Awdurdodau Lleol a'r Llysoedd. Mae hyn wedi arwain at drafodaethau ac ymchwil ynghylch yr amrywiadau yn y cyfraddau atgyfeirio rhwng Awdurdodau Lleol, y defnydd a wneir o arbenigwyr mewn achosion a'r amrywiadau yn y cyfraddau cwblhau mewn Llysoedd ledled Cymru.
43. Un o argymhellion allweddol yr Adolygiad Cyfiawnder Teuluol yw lleihau'r amser a gymerir i gwblhau achos cyfraith gyhoeddus yn y Llys. Ar hyn o bryd, cymerir 55.4 wythnos ar gyfartaledd yng Nghymru; 26 wythnos yw'r targed. Mae CAF/CASS Cymru'n adolygu ei arferion gweithio ar hyn o bryd er mwyn sicrhau y gallwn fodloni gofynion y llwybr 26 wythnos ar gyfer achosion cyfraith gyhoeddus pan gaiff ei weithredu yn 2014.
44. Mae CAF/CASS Cymru hefyd yn aelod o Is-Grŵp Perfformiad a Gwella'r Bwrdd Cyfiawnder Teuluol sy'n gyfrifol am ddadansoddi'r wybodaeth sydd ar gael am berfformiad ac am symbylu camau gweithredu i wella perfformiad yn genedlaethol ac yn lleol yng Nghymru a Lloegr, gan gefnogi rôl y Byrddau Cyfiawnder Teuluol Lleol newydd.
45. Unwaith y bydd mwy o eglurder ynghylch deddfwriaeth a disgwyladau barnwrol yn cael ei gyhoeddi, mae CAF/CASS Cymru wedi cytuno i hwyluso cyfres o weithdai ar y cyd ar gyfer staff Awdurdodau Lleol, GLITEM a CAF/CASS Cymru yn gynnwys yng ngwanwyn 2013.

CAF/CASS Cymru: y cam nesaf

46. Mae CAF/CASS Cymru yn cydnabod ei fod wedi gwneud cynnydd sylweddol gyda'i raglen newid, ond bod y gwaith yn parhau.
47. Mae CAF/CASS Cymru yn gwerthfawrogi'r perthnasoedd y mae wedi eu datblygu gyda Chymdeithas Cyfarwyddwyr Gwasanaethau Cymdeithasol Cymru a Phenaethiaid Gwasanaethau Plant ledled Cymru; y Farnwriaeth ac GLITEM a rhanddeiliaid ehangach trwy ei Bwyllgor Cynghori. Mae CAF/CASS Cymru hefyd yn sylweddoli na all y newidiadau angenrheidiol ddigwydd ar eu pen eu hunain ac rydym yn cydweithio'n agos â'n partneriaid i ddatblygu cytundebau cyffredin ar y system ar ôl y diwygiadau.
48. Mae CAF/CASS Cymru yn benderfynol o gyflawni'r cynlluniau uchelgeisiol a nodir yn ei gynllun strategol.